

## CONVENIO DE COLABORACIÓN ENTRE A AXENCIA DE TURISMO DE GALICIA E A FUNDACIÓN FEIRAS E EXPOSICIÓNS DE OURENSE (EXPOURENSE) PARA A CELEBRACIÓN DA 26ª EDICIÓN DE XANTAR, SALÓN INTERNACIONAL DE TURISMO GASTRONÓMICO

O xerente de Turismo de Galicia

### DECLARA:

Que esta Axencia Turismo de Galicia formalizou coa Fundación Feiras e Exposicións de Ourense (EXPOURENSE) o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2025.

Que o instrumento convencional ten por obxecto o establecemento das condicións para a colaboración entre a Axencia de Turismo de Galicia e Expourense para a celebración da 26ª edición de Xantar Salón Internacional de Turismo Gastronómico que se levará a cabo na cidade de Ourense, do 20 ao 23 de novembro de 2025, para promover o coñecemento da gastronomía galega como un dos elementos esenciais do desenvolvemento turístico de Galicia.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



**Segundo.-** Que a Fundación Feiras e Exposicións de Ourense (Expourense), entidade sen ánimo de lucro tal e como establece o artigo 1 dos seus estatutos, ten como obxecto destinar e afectar un patrimonio á realización de fins xerais de interese galego no ámbito sectorial á que a súa denominación e fins se contraen, entre os cales se sinalan a promoción de actividades comerciais, industriais, agroindustriais, sociais e calquera outra que teña por obxecto a promoción e desenvolvemento destes sectores en Galicia e o nivel profesional de todos os sectores da actividade económica contribuíndo á mellora do nivel de vida do medio urbano e rural. O Salón Internacional de Turismo Gastronómico é un evento organizado en exclusividade por Expourense para a promoción e fomento da actividade económica do sector turístico, que pola súa importancia está posicionado como un evento de prestixio no panorama peninsular.

**Terceiro.-** Que o Salón Internacional de Turismo Gastronómico é unha feira que chega á súa 26ª edición e terá lugar do 20 ao 23 de novembro de 2025. Congrega a milleiros de persoas, transformando o recinto de Expourense nun gran centro de restauración. É a única feira internacional de Turismo Gastronómico recollida no calendario oficial de Feiras Comerciais Internacionais españolas.

Cunha traxectoria de máis de 25 anos poñendo en valor os produtos agroalimentarios de calidade, a elaboración e o servizo profesional, Xantar consolidouse como o único salón internacional especializado en turismo gastronómico acreditado da Península Ibérica. A súa proposta une a calidade agroalimentaria, o turismo sostible e a promoción do territorio a través da gastronomía.

En Xantar converxen destinos, produtos, chefs e expertos nunha experiencia sensorial, comercial e formativa. Cada edición convértese nun escaparate para os produtos con denominación de orixe, as cociñas tradicionais e creativas e a promoción turística con identidade cultural e sabor propio.

O salón reforza os seus vínculos internacionais, especialmente con Portugal e Iberoamérica, promovendo un modelo de cooperación transfronteiriza e intercambio en turismo gastronómico.

Este salón ofrece unha vinculación de carácter experiencial entre o expositor e o visitante a través de diversas accións, que fusionan a tradición e innovación propia dos territorios presentes en Xantar en forma de exhibicións, catas temáticas, cociña en directo e moitas máis iniciativas que suceden durante catro días de intensa actividade.



Dentro dos obxectivos do salón atópase a dinamización do rural a través da enogastronomía e do turismo, promovendo produtos innovadores que destacan pola súa materia prima e calidade.

Xantar é moito máis que unha feira gastronómica: é un foro dinámico de coñecemento, promoción e experiencias onde converxen o turismo, a saúde, a sustentabilidade e a cultura. Ao longo dos seus catro días de celebración, desenvólvense actividades pensadas para todos os públicos, cun enfoque especial no sector gastronómico e turístico.

Tanto para profesionais como para público xeral organízanse actividades como encontros, conferencias, degustacións, talleres gastronómicos, aulas de cata e degustacións, entre outras moitas.

Que a través deste convenio, outórgase a EXPOURENSE unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

